


Minister Otmar Oduber:

Busnan Electrico lo consumi 60% menos pa kilometer compara cu diesel



ORANJESTAD (AAN): Den cuadro di e proyecto piloto di busnan electrico, Minister di Turismo, Transporte y Labor Otmar Oduber a splica durante e entrega di e prome E-bus BYD cu ta un hecho cu e busnan electrico aki ta hopi mas economico cu e busnan tradicional cu Arubus ta usando al momento.

Mirando e situacion economico cu Arubus a pasa aden, e mandatario y Arubus a sondea pa e posibilidadnan pa asina aki baha casto, economisa y poco poco haci di Aruba su com-

pania di transporte publico un ehempel den Caribe pa loke ta trata vehiculo di transportacion sostenibel. Minister di Transporte Otmar Oduber ta indica cu e busnan electrico aki den comparacion cu e busnan tradicional, lo consumi 60% menos compara cu fuel of diesel.

Estudionan haci pa Arubus ta indica cu e costo di un bus tradicional pa cu diesel ta 0,80 cent per kilometer compara cu un bus electrico cu lo usa 0,30 cent na coriente per kilometer.

Cu e proyecto piloto aki di

6 luna, Arubus lo bay haci un estudio mas extenso pa asina aki calcula e duracion di e baterianan pa cu Aruba, mirando cu e expectativa ta cu e baterianan lo dura basa riba e conducta di uso aki na Aruba mucho mas largo. E costo di mantencion di e bus electrico tambe ta hopi barata, caminda lo no haci uso di azeta, sparkplugs y filters, cu ta piesanan bastante caro pa adkeri pa e servicio di un bus tradicional.

E mandatario ta splica cu mester wak e inversion aki a largo plazo, mirando cu por medio di spaar riba e diesel y mantencion lo ta economicamente favorabel pa Arubus.

Pa Minister Otmar Oduber ta importante pa pone enfoka riba e hecho cu e bus electrico lo sali Arubus mas barata na coriente di loke nan ta gastando na fuel/diesel, sin laga afor cu lo ta contribuyendo na e medio ambiente usando energia sostenibel tambe.